

# ԱԶԴԱՐԱՐ

ՏԵՂԵԿԱՏՈՒ ԱՐԱՋՆՈՐԴԱՐԱՆԻ ՀԱՅՈՑ ՔՈՒԷՅԹԻ ԵՒ ԵՐԶԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: [prelacy@armenianprelacykw.org](mailto:prelacy@armenianprelacykw.org)

ՆՈՐ ԵՐԶԱՆ, Ժ. Տարի, Թիւ 443, Ուրբաթ, 29 ՅՈՒՆԻՍ, 2018

ՀԱՄԱՅՆՔԱՅԻՆ

## Քուէյթի Ազգային Վարժարանին Մէջ Տեղի Ունեցաւ «Ներսէս Շնորհալի» Մրցանքին Տուչութիւնը



Չորրորդ տարին ըլլալով, չորեքշաբթի, 20 յունիս 2018-ին Քուէյթի ազգային վարժարանին մէջ յանձնուեցաւ ազգային բարերար, հրապարակագիր Կիրակոս Գոյումճեանի կողմէ հաստատուած «Ներսէս Շնորհալի» մրցանակը (1000 քուէյթեան տինար), որ կը տրուի Քուէյթի պաքալորեայի պետական քննութիւններուն բարձրագոյն նիշ ապահոված հայ ուսանողին: Մրցանակին նպատակն է խրախուսել աշակերտին ուսումնաստենչութիւնը եւ բարձրագոյն կրթութիւն ստանալու ոգին:

Ներկայութեամբ Քուէյթի եւ շրջակայից թեմի առաջնորդ Մասիս եպս. Զօպույեանի, Կիրակոս Գոյումճեանի, Ազգային վարժարանի տնօրէնութեան եւ ուսուցչական կազմին, վարժարանի հոգաբարձութեան ատենապետ Ֆիլիփ Բաթաթանեանին,

մրցանակակիր աշակերտուհի Նայիրի Միքայելեանի եւ անոր ծնողներուն, ազգային վարժարանի տնօրէն տոքթ. Ներսէս Սարգիսեան շնորհաւորեց մրցանակակիրը՝ անոր մաղթելով նորանոր յաջողութիւններ:

Ան նաեւ իր երախտագիտութիւնը յայտնեց Կիրակոս Գոյումճեանին՝ հայ ուսանողը իրախուսելու նպատակով կատարած այս գնահատելի նախաձեռնութեան համար, ինչպէս նաեւ վարժարանի դասարաններէն մէկուն ամբողջական վերանորոգութիւնը ստանձնելու պատրաստակամութեան համար:

Աւարտին Կիրակոս Գոյումճեան շնորհաւորեց Նայիրի Միքայելեանը՝ մաղթելով յարատեւ վերելք եւ նորանոր նուաճումներ, ինչպէս նաեւ յոյս յայտնեց, որ սոյն մրցանակը ամենափոքրը դառնայ Նայիրիի ուսումնական ասպարեզին մէջ:



**ՀԱՅԿԱԿԱՆ**

**Նախագահ Սարգսյան Մասնակցած Է Միացեալ Նահանգներու Ծերակոյտի Մէջ Կազմակերպուած Ընդունելութեան**

Եռօրեայ աշխատանքային այցելութեամբ Միացեալ Նահանգներ գտնուող Հայաստանի Հանրապետութեան նախագահ Արմէն Սարգսյան, 26 Յունիսին ելոյթով հանդէս եկած է Միացեալ Նահանգներու Ծերակոյտի Տրքսեն մասնաշէնքին մէջ տեղի ունեցած ընդունելութեան ընթացքին, որ նուիրուած էր Հայաստանի Հանրապետութեան եւ հայ-ամերիկեան դիւանագիտական յարաբերութիւններու 100-ամեակին:

Միացեալ Նահանգներու մէջ Հայաստանի Հանրապետութեան դեսպանութեան, ՀՅԴ Արեւելեան Ամերիկայի Կեդրոնական կոմիտէին եւ Ուաշինկթընի Հայ դատի գրասենեակին միացեալ ջանքերով կազմակերպուած հանդիսաւոր արարողութիւնը եզրափակեց Միացեալ Նահանգներու Արեւելեան ափին տեղի ունեցած 100-ամեակի տօնակատարութիւններուն շարքը:



Հանդիսութեան ընթացքին Հայաստանի Հանրապետութեան նախագահը հանդէս եկած է ելոյթով, ուր մասնաւորապէս անդրադարձած է Հայաստանի Ա. Հանրապետութեան դերին ու նշանակութեան, կարեւոր նկատած է Հայաստանի եւ Միացեալ Նահանգներու միջեւ ձեւաւորուած բարեկամական յարաբերութիւններն ու անոնց խորացման անհրաժեշտութիւնը, խօսած հզօր եւ զարգացած երկիր ունենալու մասին, որով աշխարհի բոլոր հայերը իրենք զիրենք հպարտ կը զգան:



«Մեր այսօրուան ուղերձը յստակ է: Մենք պետք է յաղթենք: Մենք ո՛չ միայն կրնանք նոր Հայաստան կառուցել, այլև հզոր երկիր մը, որով բոլորս հպարտ պիտի ըլլանք եւ աշխարհի վրայ մեզ հպարտ պիտի զգանք, որ հայ ենք», նշած է հանրապետութեան նախագահը:

Ընդունելութեան մասնակցած են ամերիկահայ համայնքի տարբեր շրջաններէ հասած քանի մը հարիւր անդամներ, Միացեալ Նահանգներու Քոնկրեսի եւ Օերակոյտի անդամներ, վարչակազմի բարձրաստիճան պաշտօնեաներ:

## Շուէտը Պատրաստ է Սերտ Գործակցութեան՝ Հայաստանի Հանրապետութեան Կառավարութեան Հետ



Վարչապետ Նիկոլ Փաշինեան ընդունած է Հայաստանի մէջ Շուէտի արտակարգ եւ լիազօր դեսպան Մարթինա Կուիքը:

Վարչապետը նշած է, որ Հայաստանի Հանրապետութեան կառավարութիւնը շահագրգռուած է տարբեր ոլորտներու մէջ հայ-շուէտական յարաբերութիւններու զարգացումով եւ այդ առումով կարելոր նկատած է դեսպանին աշխուժ գործունէութիւնը՝ ճշգրիտ արդիւնքներ արձանագրելու տեսակէտէն: Վարչապետ Նիկոլ

Փաշինեան ընդգծած է առեւտրական շրջանառութեան ծաւալներու բարձրացման անհրաժեշտութիւնը եւ աւելցուցած, որ կառավարութիւնը էապէս կարելոր կը նկատէ արտաքին ներդրումներու ներգրաւումը, գործարարական կապերու ընդլայնումը: Վարչապետը շեշտած է, որ Հայաստանի Հանրապետութեան նոր իշխանութիւնները իրենց առջեւ դրած են յաւակնոտ ծրագիրներ՝ ընդգծելով, որ անոնց իրականացումը կը նկատէ հաճելի պարտաւորութիւն:

Դեսպանը վստահեցուցած է, որ բոլոր ջանքերը ի գործ պիտի դնէ երկկողմանի համագործակցութեան նոր թափ հաղորդելու նպատակով: Դեսպան Մարթինա Կուիք նշած է, որ Շուէտը պատրաստ է սերտ փոխգործակցութեան Հայաստանի Հանրապետութեան կառավարութեան հետ՝ ժողովրդավարութեան ամրապնդման, փտածութեան դէմ պայքարի, մարդու իրաւունքներու պաշտպանութեան, տնտեսութեան զարգացման եւ այլ ուղղութիւններով:

Ջրուցակիցները անդրադարձ կատարած են նաեւ Հայաստան-Եւրոպական Միութիւն յարաբերութիւններու հետագայ զարգացման:

Վարչապետ Նիկոլ Փաշինեան կարելոր նկատած է Արեւելեան գործընկերութեան ծրագիրը եւ Հայաստան-Եւրոպական Միութիւն Համապարփակ ու ընդլայնուած գործընկերութեան համաձայնագիրի շրջագիծին մէջ նախատեսուող ծրագիրներու իրականացումը:

**WWW.AZTAGDAILY.COM**

## **Ալպանիոյ, Թուրքմենիստանի, Լիբանանի Եւ Քանադայի Քաղաքացիները Կրնան Առանց Մուտքի Արտօնագիրի Այցելել Հայաստան**

«Արմէնփրես» կը հաղորդէ, թէ Ալպանիոյ, Թուրքմենիստանի, Լիբանանի եւ Քանադայի քաղաքացիներուն համար Հայաստանը 10 յուլիս 2018-էն սկսեալ պիտի կիրարկէ առանց մուտքի արտօնագիրի դրութիւն: Այս մասին որոշումի նախագիծը ընդգրկուած է կառավարութեան 28 Յունիսի նիստի օրակարգին մէջ:

Որոշումին ընդունումը թոյլ կու տայ վերոյիշեալ պետութիւններու քաղաքացիներուն այցելել եւ մնալ Հայաստանի Հանրապետութեան տարածքին մէջ առաւելագոյնը 180 օր ժամկէտով՝ մէկ տարուան ընթացքին: «Ատիկա ո՛չ միայն կը նպաստէ զբօսաշրջութեան խրախուսման ու խթանման, այլեւ նոր սկիզբ կը հանդիսանայ ժողովուրդներու հոգեւոր եւ պատմամշակութային արժէքներու փոխադարձ ճանաչման, երկկողմանի համագործակցութեան շարք մը նոր մարզերու ուրուագծման եւ զարգացման համար», նշուած է նախագիծի հիմնաւորումին մէջ:

## **Քալիֆորնիոյ Ծերակոյտի Յանձնախումբը Վաւերացուց Թուրքիայէն Ներդրումները Ետ Քաշելու Բանաձեւը**

Քալիֆորնիոյ նահանգային ծերակոյտի Հանրային պաշտօնէութեան եւ հանգստեան կոչուելու հարցերով յանձնախումբը 25 Յունիսին 4 թեր եւ 1 ձեռնպահ քուէով վաւերացուց Թուրքիայէն նահանգային ներդրումները ետ քաշել պահանջող թիւ 1597 բանաձեւը, որ այժմ պիտի փոխանցուի Արդարադատութեան յանձնախումբին:

Նահանգային խորհրդարանին կողմէ անցեալ տարի վաւերացուած սոյն բանաձեւին հեղինակը խորհրդարանի անդամ Ատրին Նազարեանն է, որ նոյն յանձնախումբին առջեւ ունեցած իր ելոյթին ընթացքին բանաձեւը կապեց Հայոց ցեղասպանութիւնը ուրանալու Թուրքիոյ քաղաքականութեան, ինչպէս նաեւ ուրացման քայլը պատժելու կարեւորութեան հետ:

Բանաձեւը կ'առաջադրէ նահանգի ներդրումները դուրս բերել Թուրքիայէն՝ իբրեւ հակազդեցութիւն Հայոց ցեղասպանութիւնը ուրանալու Անգարայի վարքագիծին: Անկախ յատկապէս կ'արգիլէ Քալիֆորնիոյ պաշտօնէաներու եւ ուսուցիչներու թոշակներու հիմնադրամներուն որեւէ ներդրում կատարել թրքական կառավարութեան պատկանող, կամ անոր կողմէ կառավարուող, կամ անոր հետ առնչուող տնտեսական ձեռնարկութիւններու մէջ: Բանաձեւին մէջ կը շեշտուի նաեւ, որ Թուրքիա Քալիֆորնիոյ կատարած ներդրումներէն յատկանշական շահեր կ'ապահովէ եւ Հայոց ցեղասպանութիւնը ուրանալու ջանքերուն առնուազն մէկ մասը կը հովանաւորուի նշեալ ներդրումներուն պատճառած շահերով:

Արեւմտեան Ամերիկայի Հայ դատի յանձնախումբի ատենապետ իրաւաբան Նորա Յովսէփեան ողջունեց այս քայլը՝ յիշեցնելով, որ Հայ դատի յանձնախումբը վերջին քանի մը տարիներուն այս հարցով մօտէն կը գործակցի ներդրումները ետ քաշելու արշաւը նախաձեռնած Հայ երիտասարդաց դաշնակցութեան, ինչպէս նաեւ Ատրին Նազարեանի հետ:

**ՄԻՋԱԶԳԱՅԻՆ**

**Միացեալ Նահանգներու Նախագահը Շնորհաւորեց  
Էրտողանը՝ Ընտրութիւններուն Արձանագրած  
Ցաղթանակին Առիթով**

Նախանցեալ օր երեկոյեան տեղի ունեցած հեռաձայնային հաղորդակցութեան ընթացքին Միացեալ Նահանգներու նախագահ Տոնալտ Թրամփ շնորհաւորեց իր թուրք պաշտօնակից Ռեճեփ Թայիփ Էրտողանը՝ ընտրութիւններուն արձանագրած յաղթանակին առիթով:



Թուրքիոյ նախագահի մամլոյ ծառայութեան հաղորդագրութեան համաձայն, Էրտողան ու Թրամփ նաեւ համաձայնեցան բարելաւել թուրք-ամերիկեան յարաբերութիւնները՝ «նախ եւ առաջ պաշտպանութեան եւ ապահովութեան բնագաւառներուն մէջ»:

Հաղորդագրութեան համաձայն, կողմերը նաեւ քննարկեցին սուրիական Սընպեժ քաղաքին մէջ տիրող կացութիւնը եւ յառաջիկայ

շաբաթներուն երկկողմանի հանդիպում կայացնելու համաձայնութիւն ձեռք բերին:

Թուրքիոյ նախագահի աշխատակազմը յայտնեց, որ Թրամփ-Էրտողան բանակցութիւնները տեղի պիտի ունենան Պրիւքսելի մէջ՝ 11-12 յուլիսին նախատեսուած ՕԹԱՆ-ի վեհաժողովի ծիրին մէջ:

Վերջին օրերուն, սակայն, ամերիկեան քաղաքական շրջանակներու շարք մը ներկայացուցիչներ Սպիտակ տան պաշտօնէաներուն կոչ կ'ուղղէին Էրտողանին ուղղուած շնորհաւորանքներու հարցին մէջ շատ չշտապելու՝ ընդգծելով յատկապէս Թուրքիոյ մէջ մարդկային իրաւունքներու ոլորտին մէջ տիրող անմխիթար կացութիւնը:

Ամերիկեան Քոնկրէսի ամենէն յայտնի հայամետ անդամներէն մէկը՝ Լոս Անճելըսէն ընտրուած դեմոկրատական Էտրմ Շիֆ «Թուիթըր»-ի իր էջին մէջ գրած է. «Այս կիրակի Էրտողան չակերտաւոր յաղթանակ արձանագրեց իր վերընտրութեան ընթացքին միայն ընդդիմութեան թուլացման, ձեռքակալութիւններու, բռնութիւններու եւ մամլոյ ազատութեան ճնշման շնորհիւ: Թուրքիոյ մէջ բռնատիրական համակարգի հաստատումը անգամ մը եւս կը յիշեցնէ, որ այսօր աշխարհով մէկ ժողովրդավարութիւնը յարձակման թիրախի վերածուեցաւ: Մի՛ շնորհաւորէք [Էրտողանը]»:

Էտրմ Շիֆի այս գրառումին, նոյնպէս «Թուիթըր»-ի միջոցով, գրեթէ անմիջապէս հակադարձեց Թուրքիոյ նախագահի մամլոյ բանբեր Իպրահիմ Քալըն:

**WWW.LRAGIR.AM**

«Քոնկրետական Էտրմ Շիֆ, նախագահ Էրտոդան հաստատ ձեր շնորհատրանքին կարիքը չունի: Թուրքիոյ ժողովուրդը արտայայտած է իր տեսակետը: Պարզապէս կտրեցէ՛ք ձեր ձայնը», գրած էր Էրտոդանի բանբերը:

Նոյն ժամերուն, երբ Թրամփ ու Էրտոդան իրարու հետ հեռաձայնով կը զրուցէին եւ «Թուիթըր»-ի վրայ Էտրմ Շիֆի եւ Իպրահիմ Քալընի հեռակայ բանավեճը ծաւալած էր, Ուաշինկթընի մէջ՝ Ծերակոյտի արտաքին յարաբերութիւններու ենթայանձնախումբին մէջ եւս կը քննարկէին Թուրքիոյ հետ յարաբերութիւնները:

Ծերակոյտին մէջ կազմակերպուած լսումներուն ընթացքին Միացեալ Նահանգներու արտաքին գործոց նախարարի՝ Երոպայի եւ Եւրասիոյ հարցերով օգնական Ուես Միթչըլ չբացառեց Անգարայի դէմ պատժամիջոցներու հեռանկարը: Ըստ ամերիկացի դիւանագետին, ասիկա աւելի քան հաւանական կը դառնայ, եթէ Թուրքիա շարունակէ խորացնել ռազմաարհեստագիտական համագործակցութիւնը Ռուսիոյ հետ:

«Թրքական կառավարութեան ներկայացուցիչներուն հետ մեր բոլոր շփումներուն ընթացքին մենք շատ յստակօրէն նշած ենք, որ Ռուսիայէն «Էս-400» համակարգերու ձեռքբերման պարագային բարդութիւններ կը ծագին: Այս մասին մենք բազմիցս ըսած ենք Թուրքիոյ կառավարութեան ամէնէն բարձրաստիճան ներկայացուցիչներուն: Երբ պարզ դառնայ, որ այս համակարգերու համար վճարումը արդէն իսկ կատարուած է, պատժամիջոցներ կը սահմանուին: Բացի անկէ, մենք նշած ենք, որ «Էս-400» համակարգերու ձեռքբերումը անխուսափելիօրէն պիտի ազդէ ռազմական արդիւնաբերութեան ասպարէզին մէջ Թուրքիոյ եւ Միացեալ Նահանգներու միջեւ ծաւալուած համագործակցութեան հեռանկարներուն վրայ: Ատիկա կը վերաբերի նաեւ [Թուրքիոյ կողմէ] «Էֆ-35» օդանաւերու ձեռքբերման», յայտնեց արտաքին գործոց նախարարի օգնականը:

## **Հարաւային Սուտանի Մէջ Մնայուն Չինադադարի Մասին Համաձայնութիւնը Կը Սկսի Գործադրման 72 Ժամուան Ընթացքին**



Հարաւային Սուտանի նախագահ Սալվա Բեր եւ իր հակառակորդը՝ Ռիաք Մաշար համաձայնեցան հաստատել «մնայուն» զինադադար մը, որ պիտի գործադրուի 72 ժամուան ընթացքին:

Համաձայնութեան ստորագրութենէն ետք, Բեր յայտնեց, որ ասիկա Հարաւային Սուտանի ժողովուրդին սպասած օրն է, որ հասաւ հիմա:

Յայտարարութեան մէջ կը նշուի, որ զինադադարի համաձայնագիրը կը ներառէ դադրեցնել բախումները, դուրս բերել բոլոր դաշնակից ուժերը, բանալ մարդասիրական միջանցքները, ազատ արձակել պատերազմի բանտարկեալները եւ քաղաքական բանտարկեալները:

## ԱԿՆԱԼԿ

# Համաթրքական Ազգայնականությունը՝ Խորքային Պետութեան Հիմնական Բաղադրիչը

Թուրքիոյ մէջ տեղի ունեցած նախագահական եւ խորհրդարանական ընտրութիւններուն արդիւնքները վերլուծական մեկնաբանութիւններու հարուստ գրականութիւն ստեղծելու ուղղութեամբ կը զարգանան:

Համաշխարհային լրատուադաշտը լուսարձակներ կը կեդրոնացնէ յատկապէս Էրտողանական Թուրքիոյ տարածաշրջանայինէն դէպի համաշխարհային խաղցողի անցում կատարելու յայտարարութիւններու գործնական կարելիութիւնները տեսնելու ուղղութեամբ:

Քանի մը դիտարժան կէտեր յամենայն դէպս արդիւնքներու անմիջականութեամբ եւ հեռանկարային ուրուագծումի փորձերով կարելի է արձանագրել:

Համեմատական տրամաբանութիւնը կարելոր է այն առումով, որ վերջին նախագահական ընտրութիւններու արդիւնքներուն բաղդատմամբ Էրտողանը ձեռք ձգած է տոկոսային առաւելութիւն, մինչ իր ղեկավարած կուսակցութիւնը նախկին խորհրդարանական համեմատութիւններու առումով՝ տոկոսային յետընթաց:

Նախագահի անձին յառաջընթացն ու իր ղեկավարած կուսակցութեան յետընթացը իրենց տարբեր բացատրութիւնները կրնան ունենալ: Այստեղ կան տնտեսական իրավիճակի նահանջի, թրքական թղթոսկիի արժեզրկման միտումներու եւ անոնց հետ կապուած ընկերային տագնապի ու ժողովրդային դրսեւորումներու իրականութիւնները, միւս կողմէ՝ նախագահ Էրտողանի ազգայնա-իսլամական առանցքներու վրայ կատարած յիշարտանքները՝ Թուրքիան աշխարհի հզօրագոյն տասը երկիրներու ցանկին մէջ ներառելու:

Ճիշդ այստեղ պէտք է նկատել անպայման համաթրքական-ազգայնամուլական կուսակցութեան երկփեղկումի երեւոյթը ընտրութիւններու նախօրեակին եւ անոր մէկ հատուածին ներգրաւումը Էրտողանի կուսակցութեան իսկ միւս հատուածին՝ Հանրապետական ժողովուրդի կուսակցութեան կազմած դաշինքներուն մէջ:

Ծրագրուած-բեմականացուած թե՛ իրողական այս երկփեղկումին արդիւնքը այն է, որ երկրի երկու գլխաւոր խորհրդարանական յենասիւնները կազմուած են համաթրքական գաղափարախօսութեան ազգայնամուլական տարրերէ, որոնք ձեռով մը կարծէք նախկին



զինուորական յատկանիշով բնութագրուող Թուրքիոյ խորքային պետութեան դերը կը կատարեն:

Ազգայնական հատուածին հետ ընտրական դաշինք կազմած Էրտողանը խորհրդարանական ընտրութիւններուն արձանագրած է ետքայլ: Մինչ, ժողովուրդներու ժողովրդավարական կուսակցութիւնը, աւելի ծանօթ՝ քրտամետ կուսակցութիւնը, հակառակ իր դէմ կիրարկուած ամենախիստ ճնշամիջոցներուն, ձերբակալութիւններուն եւ բանտարկութիւններուն, յաջողած է յաղթահարել անցողիկ շեմը եւ դարձեալ բաղդատմամբ նախորդ ընտրութիւններուն արձանագրել տոկոսային



փոքր առաւել:

Կը թուի, որ հասարակական բեւեռացումը ըստ էութեան ազգայնական իսլամականութեան եւ ազգային փոքրամասնութիւններու եւ ընդհանրապէս քաղաքացիական հասարակութեան իրաւունքներու պաշտպանութեամբ հանդէս եկող ուժերուն միջեւ պիտի ձեւաւորուի:

Ազգայնամուլական տարրը այսօր ներգրաւուած է թէ՛ Արդարութիւն եւ բարգաւաճում եւ թէ՛ Հանրապետական ժողովուրդի կուսակցութիւններուն մէջ: Ընդհանուր յայտարարը երկու մեծագոյն կուսակցութիւններուն միջեւ համաթրքական ազգայնականութիւնն է, որուն գաղափարախօսութիւնը ըստ էութեան շարժիչ գործօնն է պաշտօնական Անգարային եւ նոր սուլթանի կամ վերափոխուած Աթաթիւրքի ծրագիրները իրականացնելու համար:

## ԱՆԴՐԱԴԱՐՉ

# Խմբագրական «Հայրենիք»-ի Մարդկայնագուրկ... Եւ Իրաւագուրկ

Ողիսակա՛ն, թե՛ արհաւիրք: Նախագահ Տանըլտ Թրամփի անխոհեմ, կարճատես եւ անտրամաբանական գործունեութիւնը օրըստօրէ իր վրայ կը կեդրոնացնէ բոլորին ուշադրութիւնը՝ յաւելեալ քննադատութիւններու դուռ բանալով:

Ապօրինի գաղթականներ արտաքսելու հարցը մեծ դժգոհութեան ալիք ստեղծած եւ մելան հոսեցուցած էր, երբ այս անգամ Թրամփի ղեկավարութիւնը այլ արագ եւ կարճատես որոշում մը տուաւ, Յունիս 20-ին պաշտօնապէս տեղեկացնելով, թէ Միացեալ Նահանգները կը քաշուին Մարդկային իրաւանց խորհուրդէն:

ՄԱԿ-ի մէջ Միացեալ Նահանգներու դեսպան եւ նախագահ Թրամփի հլու կամակատար Նիքի Հէյլի յայտարարեց, թէ իր երկիրը կը քաշուի այս խորհուրդէն, այն պատճառով, թէ քաղաքական մութ հաշիւներ կան, եւ թէ ճնշումներու իբրեւ արդիւնք մարդկային իրաւունքները զոհ դարձած են այս անհանդուրժելի մթնոլորտին: Վստահաբար, իր սովորական դայլայիչներով, նոյնիսկ նախագահ Թրամփն ալ, իր «փորձառութեամբ», իւրայատուկ մեկնաբանութիւններով եւ անշուշտ յաւելեալ ձաբոտութիւններով պիտի համոզէ, թէ տրուած որոշումը տեղին է: Հաւանաբար, ամենայն ինքնավստահութեամբ եւ անտրամաբանութեամբ, ան կրնայ առաջարկել նաեւ, թէ կրնայ վերատեսութեան ենթարկել այս որոշումը, կամ վերստին միանալ ՄԱԿ-ի Մարդկային իրաւանց խորհուրդին, եթէ ընդհանուր կեդրոնատեղին փոխադրուի... Երուսաղէմ:

Բնական է, որ այսպիսի խորհուրդ պիտի զբաղի ընկերային, բարոյական եւ անշուշտ քաղաքական հարցերով: Նոյնիսկ արուեստի եւ մշակոյթի մէջ մասնագիտացած ՄԱԿ-ի հովանիին տակ գտնուող խորհուրդներ կը զբաղին քաղաքական հարցերով:

Այս որոշումին առնչութեամբ նոյնանման բացատրութիւններ տուաւ Թրամփի ղեկավարութեան այլ բանալի հլու կամակատար մը՝ արտաքին գործոց նախարար Մայք Փոմփեօ, որ իր զօրակցութիւնը յայտնեց Հէյլիի՝ շեշտելով, որ Ամերիկայի շահերը առաջնահերթ կը դասուին ամէն բանէ:

Հոս տեղին է հարց տալ, թէ աշխարհի ամէնէն աւելի ժողովրդավար եւ ազատամիտ երկիրներէն մէկը նկատուող Միացեալ Նահանգները պէտք չէ՞ որ աշխարհի մէջ գոյութիւն ունեցող մարդկային իրաւունքները արծարծող հարցեր նաեւ նկատի ունենան իբրեւ առաջնահերթութիւն:

Այսպէս, այս խորհուրդին մէջ էր, որ Լիպիա կախակայուեցաւ՝ օրուան ղեկավար Քազգաֆին խախտած ըլլալով մարդկային իրաւունքները: Այլ երկիրներու մարդկային իրաւունքներու դէմ գործած ըլլալով, երկու տարի առաջ մերժուեցաւ Ռուսիոյ գործօն անդամակցութեան իրաւունքը: Միեւնոյն մերժումը ստացան նաեւ իրենց երկրին մէջ մարդկային իրաւունքները ոտնակոխած Պիլեռոուսիան ու Ազրպէյճանը:

Հոս տեղին է ընդգծել Եւրոպական Միութեան մէկ պաշտօնական հաղորդագրութիւնը, որուն մէջ կը նշուի, թէ Միութիւնը պիտի շարունակէ պաշտպան հանդիսանալ մարդկային իրաւունքներուն ու սկզբունքներուն, թէ դժբախտաբար Միացեալ Նահանգներ կը նահանջեն ժողովրդավարութեան կողմնակից եւ քաջալեր պետութեան իրենց դերէն:

Մէկ խօսքով՝ ՄԱԿ-ի Մարդկային իրաւանց խորհուրդէն դուրս գալու Միացեալ Նահանգներու այս որոշումը կը նկատուի մարդկայնագուրկ... եւ իրաւագուրկ:

*ԼՈՒՐԵՐ ԳԱՂՈՒԹՆԵՐԷՆ*

**Հալեպի Նահանգապետը Սրբազան Հոր  
Ընկերակցութեամբ Այցելեց Հալեպի Վերանորոգուող  
Սրբոց Քառասնից Մանկանց Մայր Եկեղեցի**



24 Յունիսի առաւօտ, հրաւերով Բերիոյ հայոց թեմի առաջնորդ Շահան արք. Մարգիսեանի եւ Ազգային իշխանութեան, Հալեպի նահանգապետ Հուսէյն Տիսալ այցելեց Հալեպի Ճրտէիտէ շրջանին մէջ գտնուող Ս. Քառասնից Մանկանց Մայր եկեղեցի եւ սրբազան հօրմէն տեղեկացաւ պատերազմի ընթացքին ահաբեկիչներու հրթիռակոծումներու իբրեւ հետեւանք եկեղեցւոյ կրած վնասներուն եւ թեմին կողմէ, հնագիտական եւ կրօնական կառոյցներու վերանորոգման օրէնքներուն համապատասխան, իրականացուող բարեկարգումի մասնագիտական աշխատանքներուն:

Սրբազան հայրը շեշտեց, որ աշխատանք կը տարուի եկեղեցւոյ դռները հաւատացեալներուն դիմաց կրկին բանալու, յատկապէս նկատի ունենալով, որ այս եկեղեցին պատմական ու մանաւանդ եզակի խորհրդանշական մեծ արժէք կը ներկայացնէ եւ աւելի քան 600 տարուան կեանք ունի:

## Նախարար Զոհրաբ Մնացականեանի Հանդիպումը ՀՅԴԵՐ րոպայի Հայ Դատի Գրասենեակի Ղեկավարին Հետ

Աշխատանքային այցելութեամբ Պելճիբայի մայրաքաղաք Պրիսթել գտնուող Հայաստանի արտաքին գործոց նախարար Զոհրաբ Մնացականեան Հայաստանի դեսպանատան մէջ հանդիպում մը ունեցաւ ՀՅԴ Երոպայի Հայ դատի գրասենեակի նախագահ Գասպար Կարապետեանի հետ: Վերջինը նախարար Մնացականեանին ներկայացուց Պրիսթելի եւ Երոպական երկիրներուն մէջ Հայ դատի գրասենեակներուն գործունէութիւնը՝ հանգամանալից



կերպով անդրադառնալով ընթացիկ ծրագիրներուն եւ համահայկական օրակարգը յառաջ մղելու ուղղութեամբ ձեռնարկուող քայլերուն:

Արտաքին գործոց նախարարը ներկայացուց դարաբաղեան տագնապը բացառապէս խաղաղ լուծման գործընթացին կառչած մնալու Հայաստանի մօտեցումներուն:

### «Ֆրանսայի Մէջ Արցախի Օրեր»ու Մեկնարկ

16 Յունիսին Ֆրանսայի Մարտիկ քաղաքին մէջ մեկնարկեց «Ֆրանսայի մէջ Արցախի օրեր» փառատօնը: Փառատօնի ծիրին մէջ նախատեսուած են Արցախին նուիրուած լուսանկարներու եւ գծագրութիւններու ցուցահանդէսներ, ինչպէս նաեւ Արցախի նուիրուած վաւերագրական ու շարժանկար ժապաւեններու ցուցադրութիւններ:



Հանդիսաւոր բացման արարողութեան իրենց մասնակցութիւնը բերին Ֆրանսայի մէջ Արցախի ներկայացուցիչ Յովհաննէս Գեորգեան, Մարտիկի քաղաքապետ, Ազգային ժողովի նախկին պատգամաւոր Գափի Շարուն, խորհրդարանի անդամ Փիեռ Տարելիլ, Պուշ տիւ Ռոնի նահանգային խորհուրդի անդամներ, Մարտիկի Հայկական միութեան նախագահ Կրեկուար Մինասեան, գործարարներ, համայնքի կառոյցներու, հասարակական կազմակերպութիւններու ներկայացուցիչներ եւ լրագրողներ:

## **Միացեալ Նահանգներու Մէջ Արցախի Ներկայացուցիչին Աշխատանքային Այցելութիւնը**

12-14 Յունիսին Միացեալ Նահանգներու մէջ Արցախի ներկայացուցիչ Ռոպերթ Աւետիսեան աշխատանքային այցելութիւն մը տուաւ Արժանթին, ուր հանդիպում ունեցաւ գաղութի



պատկան մարմիններու ներկայացուցիչներուն հետ:

ՀՅԴ Կեդրոնական կոմիտէին հետ հանդիպումին ընթացքին քննարկուեցան փոխադարձ հետաքրքրութիւն ներկայացնող հարցեր, ինչպէս նաեւ Արժանթինի մէջ Արցախի մասին իրազեկուածութեան մակարդակի բարձրացման ուղղուած քայլերը:

Ռոպերթ Աւետիսեան նաեւ դասախօսութեամբ հանդէս եկաւ Պուէնոս Այրէսի պետական համալսարանին մէջ, ուր ներկայ էին համալսարանի դասախօսներ, ուսանողներ եւ հայկական համայնքի ներկայացուցիչներ: Աւետիսեան խօսեցաւ ազրպէյճանական-դարաբաղեան տագնապի պատմութեան ու կարգաւորման գործընթացին մասին, որմէ ետք պատասխանեց ներկաներու հարցումներուն, որոնք կը վերաբերէին տագնապի լուծման հեռանկարներուն, Արցախի արտաքին քաղաքականութեան եւ միջազգային ճանաչման գործընթացին:



**ԱՅԼԱԶԱՆ**

**Ստուգենք Մեր Գիտելիքները. Ճի՞շդ, Թե՞ Միայն...**

Արդեն ծովու եղանակը բացուած է, ոմանք օրական, ուրիշներ շաբաթական դրութեամբ ծովափ կամ լողաւազան կ' ուղղուին լողալու եւ արեւուն բարիքներէն օգտուելու համար: Մակայն որքանո՞վ ծանօթ ենք արեւուն բարիքներուն ու չարիքներուն. եկէ՛ք ստուգենք:

-1-

Արեւէն պէտք է զգուշանալ մինչեւ 60 տարեկան:

Ճիշդ


Միայն

-2-

Մարմինը ջրագրկումէ փրկելու լաւագոյն միջոցը առատ ջուր խմելն է:

Ճիշդ

Միայն



-3-

Արեւէն պաշտպանուելու լաւագոյն միջոցը պահպանիչ քսուքներ օգտագործելն է:

Ճիշդ

Միայն

-4-

Կրնանք արեւահար ըլլալ նոյնիսկ ամպոտ երկինքի տակ:

Ճիշդ

Միայն

-5-

Կարգ մը դեղեր կրնան պատճառ դառնալ, որ արեւուն պարզուելով մեր մաշկին վրայ այրուածքներ յառաջանան:

Ճիշդ

Միսալ

-6-

Մուժ գոյնի մորթ ունեցողները նուազ կ'ազդուին արեւու ճառագայթներէն, քան բաց գոյնի մորթ ունեցողները:

Ճիշդ

Միսալ

-7-

Արեւէն առաւելաբար կ'ազդուի մեր քիթը:

Ճիշդ

Միսալ

-8-

Արեւէն պաշտպանող սերերը կ'օգնեն, որպէսզի աւելի երկար պարզուինք արեւուն:

Ճիշդ

Միսալ



-9-

Արեւէն պաշտպանող սերերուն վրայ գրուած UV կրճատումը կը նշանակէ «զգուշացում»:

Ճիշդ

Միսալ

-10-

Որեւէ պաշտպանող սեր օգտագործելի է տան բոլոր անդամներուն համար:

Ճիշդ

Միայլ

### ***Պատասխաններ***

1.- Կեանքի ամբողջ տեւողութեան եւ մանաւանդ՝ 0-15 տարեկան:

2.- Ճիշդ:

3.- Պահպանիչ քսուքները առանձին բաւարար չեն, նոյնքան կարելոր են արեւի ակնոցները, գլխարկը եւ թեթեւ շապիկ մը:

4.- Ճիշդ:

5.- Ճիշդ, ահա թէ ինչու պէտք է դարմանող բժիշկին կարծիքը առնել:



6.- Ճիշդ:

7.- Բացի մեր քիթէն, նոյնքան կ'ազդուին նաեւ մեր աչքերը, ականջները եւ շրթները:

8.- Ո՛չ, այդ սերերը պարզապէս կը պաշտպանեն արեւուն անդրմանիշակագոյն ճառագայթներէն: Օրուան ընթացքին, սակայն պէտք է հրաժարիլ արեւուն պարզուելէ, մասնաւորաբար ժամը 11:00-էն 3:00-ի միջեւ, երբ արեւը սաստիկ կիզիչ եւ վնասակար կրնայ դառնալ:

9.- Միայլ, UV կրճատումը կը նշանակէ անդրմանիշակագոյն:

10.- Ո՛չ, իւրաքանչիւր տարիք եւ մորթի տեսակ ունի համապատասխան պաշտպանիչ սեր. նախքան գնել պէտք է ուշադիր կարդանք բացատրողագիրը:

**WWW.AZTARAR.COM**